

四

明

老
張
書

張
宗
祥



序

鄞藝文志著錄襄陵詩草二卷而不及種玉詞顧詞有刻本而詩草未傳忻君紹如輯四明清詩略錄其詩九首余不知其所自來一日馮君孟顓以詩草錄寄謂得之於叢殘中以其附有種玉詞始知爲孫曙舟先生作屬余刊之因讀其詩諸體略備昔人謂瘦易枯腴易肥樸易陋澹易靡論詩於今日難矣求古詩於今日則尤難淵淵乎一唱三歎深情婉至者乃得之斯草攷之鄞志傳先生登道光二年進士以知縣分發山西補襄陵

令歷官行事敘之特詳而獨不言其文學董覽軒年丈
謂先生少負詩名與陳漁珊周小厓胡藕灣諸君相唱
和篇什甚富及官襄陵明於聽斷懲訟蠹絕餽贈循聲
卓著今讀其詩即可覘其學矣夫飲酒賦詩爲吏事之
一戒毋亦以此爲荒於政乎然斯言實迂詩亦文也古
來治文於政治餘暇者多矣曾何足病斯草雖以襄陵
著且不僅爲襄陵作也意者其後嗣合其先後吟詠而
彙存者歟孫氏與吾外祖家柴氏有連先生之子學嗣
爲名翰林世居西郊廉吏之子孫必有縣延其澤者爰

刊斯草而附以詞草一卷種玉詞一卷爲傳其人且以
補鄉志之不備云民國二十五年二月後學張壽鏞序

光緒鄞縣志傳

孫家穀原名家棧字曙舟道光二年進士以知縣分發山西有鄉人爲縣令者來送行家穀問以官方曰若第視胥吏爲兄弟事無不濟矣家穀鄙之及至省補襄陵聞訟蠹有五虎爲一郡害下車果投刺請謁家穀拒之一日微服夜行密攜二僕去縣泊數十步曰六一堂叩門入博者數十人見令至駭跪突出老者衣冠長揖問姓名乃五虎中一武生也因盡獲以歸時已三鼓升堂鞫之知武生向爲窩首立褫其衿囚之餘不詳問悉

令出城有逗遛者不宥四境宵小聞風斂迹每日晨出
聽訟隨到隨結洞悉情弊奸胥猾吏不敢上下其手他
邑有控於府者皆求願檄襄陵定讞有鄰境盜賈陀娃
者獲於襄陵家穀研訊得實移解臨汾臨汾令屬列名
家穀曰以民命進階非吾願也先是襄陵民寡婦之子
李某爲救母傷同服親從減發配湖南之湘鄉越歲脫
歸母不敢匿卽自首家穀詰其歸意告曰實緣念母數
年不見故歸今幸無恙請解還配所問其母曰若娶妻
否曰娶有子否曰無家穀憫其情令母領回五日爲約

屆期果至移解之而別具書道其實乞弗罪晉俗縣令
無論缺之美惡每於年中或假壽以約餽或稱急以求
助家穀懲其習益以清操自勵五年秋充鄉試同考官
榜首王丕顯其所得士也尋丁內艱歸囊空如洗士民
郊餞靡不泣下鄰境百姓亦有道傍垂涕者服闋卒王奎
異傳子學駒字怡莊道光三十年進士翰林院編修宋訪

鄞縣藝文志

孫家穀襄陵詩草二卷

宋訪

兩浙輶軒續錄小傳

孫家穀原名家棧字曙舟號幼運鄞人道光壬午進士官山西襄陵知縣箸襄陵詩草二卷

董沛曰先生少負詩名與陳漁珊周小厓胡藕灣諸君相唱和篇什甚富及官襄陵循聲卓著不名一錢丁內艱歸士民郊餞靡不泣下鄰境百姓亦有道傍垂涕者其門下士王西樓後令吾鄞猶爲諸紳士述之

兩浙輶軒續錄選詩目

凡七首

登海曙樓遠眺

登驃騎山

南藍懷古

案此日凡五章故錄之

能仁精舍西湖濱煙光澹沱波粼粼圓覺長老此說法
經臺花雨何紛綸祖花禪枝久寂寞金繩寶地生埃塵
獨留正氣照千古姓氏流傳黨錮人崇寧初載紀綱墜
忠節遺老甘沈淪廉州郴州任移置被放歸來寓四明
一卷尊堯手自著蕭蕭破壁寒風鳴紹聖史官事失實
裕陵乃受羣邪傾公之斯文照日月奸雄膽落荆舒懲
孤忠耿耿不可滅荒階碧草青春蘋風藻月弔遺蹟

想見佛堂鐙火光青熒

題陳漁浦

呈珠

出關圖

雁門關

曉發朔平府出殺虎口

過祁縣有懷

襄陵詩草

清鄞 孫家穀曙舟著

呈鄧嶰筠師四首

郡侯

一作師門

家世漢公卿竹帛勲名繼兩京駐節關西原

好學餉軍河北亦能兵文章冠冕黃初體甲第風雲白
下城東閣祇今開壽讌官梅香早幾枝清

玉堂清迥跨金鰲暫別蓬瀛擁節旄銅虎符分新璽綬
花鵬錦豔舊宮袍封疆保障詞臣重薄領從容史筆高
故事循良仍內召鈞天重聽戛雲璈

越東形勢控明州爛漫風光指顧收山縣城高先得月
海門帆飽不驚秋笙歌幕府雙魚酒島嶼人家萬卷樓
底事丹砂勾漏訪輕裘緩帶小蓬邱

樗櫟裁成大匠斤受恩鄉校正論文夙欽常袞師千里
輒許終童冠一軍南國棠陰留赤水西山芝瑞護紅雲
羔羊春酒都人士逐隊公堂祝使君

月湖春泛曲六首

芳草連畦翠似煙風光選勝月湖邊春來更約青蓑侶
流水桃花放釣船

逸老堂開眼界遙榜人隨意此停橈多情愛煞汀前柳
繫住東西兩岸橋

軟紅幾處裊游絲花嶼初迎綽約姿半里香風吹不盡
臨流爲賦晚妝詩

照眼琉璃萬頃光碧蒲如箭繞芳塘篷窗拓處看無定
一棹隨波到嬾堂

浩淼還同渡漢槎殘紅一片淺飛霞半竿何處青帘影
煙嶼前頭賣酒家

小艇歸從月島遊宵來清景落雙眸水仙捧出菱花鏡

爲付詩人卷裏收

補窗

未許寒光縷縷通
自裁吟紙補窗櫺
玉錢影小難穿月
鐵馬聲高不漏風
雪意忽生虛室白
桃花新襯斷箋紅
天吳紫鳳看丁倒
一樣棉衣襞積工

圍爐

吹緊西風小雪天
油窗花戶坐神仙
光陰又是開鑪節
香火重尋啗芋緣
細拆紅泥新酒甕
平鋪白氍舊吟氈
灰深榻杌留殘燼
銅筋聲聲入座圓

煮雪

搏沙手向竹鑪煎鳳餅含膏細細研白地香消瓊葉碎
綠瓷春滾乳花圓殘痕欲醒梨雲夢妙悟須參蠟味禪
不是人間煙火氣黨家空自說嬋娟

簪花

冰天雪窖有春回暗遣東風火急催寒谷干枝披錦出
溫泉百斛洗妝來蒸成紅雨真如海書寄朝雲枉費才
畢竟化工難著力花魁合讓嶺頭梅

爆栗

園風山雨栗零辰兒女鎗前笑語頻撥淺鑪灰和火種
響低爆竹迸星勺紅羅炭煖添寒具黃玉膚香泥酒人
釘座盤新將餞臘還應餽歲餉比鄰

蓮蓬人

青蓮本作謫仙看花老蓬留亦幻觀醉眼已拋前日粉
香心猶賸一痕檀乍分翠袖寒猶薄纔脫紅衣夢未闌
秋夜月明風過處錯疑環珮影珊珊

月湖十詠

柳汀

隔岸綠如許煙波孰管領春深迤老堂紅露隔千步

雪汀

爲尋梅花來忘卻去時路老鴉寒不飛撲簌下高樹

芳草洲

冉冉落花去翩翩胡蝶飛迢迢望不極依依生夕暉

芙蓉洲

孤根託西岸照影涵清波我欲採爲佩秋深風露多

菊花洲

有酒甕頭熟有花籬下開閉門好覓句風雨無人來